

# Kepinulk ja kohopiimanulk — nii

Setomaad om jaet läbi ao mitund muudu — tsaariaol volosti', Eesti aol valla', Vinne aol külänõukogo' ja selsoveta', a parhilla' omma' valla', selsoveta' ja volosti'. Inemisõ' esi' omma' kutsnu' nulgõst vai kolgõst, kirot HÕRNA AARE.

Kiräsõnah om tuust edimätsenä kirotanu' Jakob Hurt «Setukeste laulude» edimätsen raamaduh. Mõnõh Setomaa kandih om tiidm-nõ umast nulgast väiga kindla ja õga külä om täpsehe paika pant. Mõnõh kandih omma' nuu' piiri' veid' o vallalitsõmba' ja mälestüs umast nulgast unõhtumah.

Edimätsih Seto Kuningriigeh olle sääne kõrd, õt õgast Setomaa nulgast tulle üts vai kats ülembsootska ja kuningriigi rahva ette ja selet mitä hüvvä näide nulgah om aastaga joosul tettü' ja mäntse' omma' näide murrõ' minkõ praavtamist tahetas.

Setomaa nulgõst om käskirälitsõ ülevaatõ kirotanu' Raivo Rimmel, Kolugast peri kodoluu-uurja. Nulkõ kaardi' om tennü' timä tütar Helve Anton.

Edimätsenä lugi setokõisi ja seto külli üle Kreutzwald, pruu-kõh küll nimme Pihkvamaa eestläse'. Külli olle sis 260 ja hingi 9000. Jakob Hurt kor'as kokko valdust seto külli ja sääll küllih elävidõ inemisi arvu 1902. aastagal. Külli olle sis 250 ja hingi arv 12 540 ja kõnõldas 12 nulgast. Tä ütles küll', õt mõnõh nulgah üts jago külli arvas hinnäst vai tõisi viil vähämbist nulgõst.

Mõtõh om s'oo aastaga kuningriigih vahtsõst Setomaa nulkõ vedonikkõ ummi rõõmõ ja murridõga Setomaa ülembsootska ja Seto Kuningriigi rahva ette kutsu'. A tuujaost om vaia tiidä' mäntse' külä' mäntse nulgä ala käävä'. Naakõ' sis Pihkva järvest, Võõpsust pääle.

